

**Oqaasiliortut tallimanngornermi februaarip ulluisa aappaanni,  
nal. 10.00 ataatsimiinnerannit imaqarniliaq**

Peqataasut: Carl Chr. Olsen, Alibak Steenholdt, Nuka Møller, Kelly Berthelsen  
aamma Sofia Geisler, allatsigalugu Kristine Olsvig.

Oqaluuserisat:

1. Oqaluuserisassanut qulequttanik akuersineq.
2. Novembarip ulluisa aappaanni ataatsimiinnermit imaqarniliamut akuersineq.
3. Oqaasiliortut siulittaasuannit ilisimatitsissutit.
4. GU-mi sammisap *filosofūp* kalaallisut taaguuserniarnera (nangitaq).
5. Oqaatsip *adoptionip* kalaallisut taaguuserniarnera (nangitaq).
6. Isak Johansenip saaffiginnissutaa oqaaseq *qerinnarpoq*.
7. Avannaamioqatigiit Oqaatsinut Siunnersuisoqatigiiffiannut ilaasortamut sinniisussamik toqqaaneq.
8. Erik Fleischerip suliaanut tunngasunik apeqput.
9. Taasariaqartut allat.


- 1 pillugu -

Erik Fleischerip suliaanut tunngasunik apeqput oqaluuserisassanut  
ilanngunneqarnerata kingorna oqaluuserisassat akuerineqarput.

- 2 pillugu -

Novembarip ulluisa aappaanni ataatsimiinnermit imaqarniliaq akuerineqarpoq.

- 3 pillugu -



CCO.: Kangerlussuarmi oqaatsinut politikkipillugu ataatsimeersuarnerup inaarutaanik inuiaqatigiinnut paasissutissiisoqarnissaa ICC-p pisortaata pisariaqartillugu suleqatigiissitat siulittaasuannut saaffiginnissutigisimavaa. Tamanna siunertaralugu suleqatigiissitat siulittaasuat Sisimiut TV-anit tusagassiilluni immiutsissimavoq, taamaallaalli Sisimiut TV-anit Sisimiormiunut takutitassiarineqartumik. Sisimiut TV-ata immiussa qanoruumut tuniniarsimagaluarpa, qanoruumiilli ataatsimeersuarneq pillugu sisamanik aallakaatitasseereersimanertik naammagalugu Sisimiut TV-ata immiussaa pisiariumasimangilaat. Tamatuma kingorna tusagassiuutinut nalunaarut Namminersornerullutik Oqartussat Tusagassiiviata nittartagaannut ilanngunneqarpoq.


Ataatsimeersuarnermi saqqummiussat assigiinngitsut oqallisigineqartullu allaganngorlugit peqataasunut tamanut agguanneqassapput.

Suleqatigiissitat ataatsimeersuarnermi pisut aallaavigalugit suleriaqqinnissartik marsimi ataatsimiissutigissavaat.

Suleqatigiissitat siulittaasuata oqaatigaa Inuit Aqqinik Akuersisartut pisortatigoortumik Oqaasileriffimmit akisussaaffigineqalerlutik nuunneqarnissaat taamatullu nutserinermut tunngasut siulliullugit piaartumik iluarsivigeqqullugit Naalakkersuisunut siunnersuutigineqassasut.

KB.: Tusagassiuutinut nalunaarummut tunngatillugu ataatsimeersuaqataasut tamakkiisumik isummertutut nalunaarutigineqarsimanerat uparuarpa, imaattussaagunaraluarpat "suleqatigiit isumaat".

Ataatsimeersuarnermi nutserinermut tunngatillugit eqqartorneqartut KIIIP-imi Naalakkersuisup isumaqataaffigeqimmagit toqqaannartumillu oqaluttaasartut amigaataalluinnalermata, allannguutissatut siunnersuutit piaartumik malersorneqartariaqarput.



AS.: Ataatsimeersuartut oqallinneranni tuluit oqaasiisa inissisimanerat pillugit Aqqaluk Lyngep Kiisara Vahl Olsenillu saqqummiussaas sukumiisumik misissorluaqqaarlugit aatsaat nalilerneqartariaqarput.


SG.: Tusagassiuutitut nalunaarummut tunngatillugu assigiinngitsut peqqutigalugit erseqqissarneqartariaqarpoq isummerneq ataatsimeersuartut tamarmik isumaginngikkaat. Tusagassiuutitut nalunaarummut inuit allat isumaat illua'tungiliussinnaangillat aammalu ataatsimeersuarnermi Islandimiut oqaatsitik pillugit qanoq inissisimanerat assersuutitut amigaatigaa.

Oqallinnermi nammineq inuttut isummat saqqummiunneqarput. Apeqquserneqanngilaq oqaatsitta nalingi suunersut, assersuutigalugu aningaasarpasuit atorlugit nutserisarneq il.il. Sanngiiffigisavut takujumangisavullu eqqartorneqanngillat.

Oqaasiliortut Oqaasileriffiullu immikkoortutut avammut sammisumik nittarsaanniaraanni, immikkoortutaat tunngavilersorluakkamik nalilersorneqartariaqarput. CCO-p Oqaasileriffimmi ittuunera, Oqaasiliortuni siulittaasuunera kiisalu suleqatigiissitani siulittaasuunera immikkoortillugit nalilersortariaqarput, aalajangiisoqartillugu piaartumik tusagassiuutitut nutserisoqarfimmullu nalunaarutigalugit.

NM.: Oqaasiliortut avammut saqquminerusariaqarput, tamannalu tunaartaralugu siunnersuutigaa Oqaasiliortuni ilaasortat toqqagaaffiup sinnerani avammut saqquminerulernissaq suliuniutigisariaqaraat. Ilanngullugu siunneruutigaa Oqaasiliortuni ataatsimiittarnerit akulikinnerulissasut, assersuutigalugu aalajangersimasumik ullut 14-it qaangiukkaangata ataatsimiittalerlutik.

AS.: Oqaasiliortunut toqqagaaffiit aallartinneri tamaasa avammut saqquminerulernissamik pilersaaruteqartoqartarpoq. TV, radio, Sermitsiaq, Atuagagdliutit il.il. atorluarnerusariaqarput. Ataatsimiinnerit tamaasa



pisariaqanngilaq siulittaasup pinngitsoorani peqataanissaa. Siulittaasup tullia ataatsimiinerni aqutsilluarsinnaavoq. Taamaaliornikkut ataatsimiittarnerit akuttuallaamik pisarnerat pinngitsoortinneqarsinnaavoq.

CCO.: Oqaasiliortut avammut saqquminngippallaarnerat ilaatigut peqquteqarpoq pisorta qarfiup ataani inissisimanermik, pisorta qarfimmullu attuumassutillit tamarmik allakkatigut atassuteqaqatigiinnissamik piumasaaqatitaqarput. Inuit allakkatigut saaffigalugit akineq ajorput. Oqaasiliortut suleriaasiat allanngartariaqassaaq, taamaattumik ilaasortat tamarmik ataatsimiinnissamut tullermut Oqaasiliortut suleriaasissaannik siunnersuusiussapput.

Ilaasortat isumaqatigiissutigaaq ullut 14-it qaangiunneri tamaasa tallimangornikkut ualikkut aalajangersimasumik ataatsimiittalerniarlutik.


- 4 pillugu -

Oqaasiliortut *filosofi* pillugu eqqartuingaatsiareerlutik aalajangerpaat oqaaseq **filosofi** kalaallisut taaguusernagu danskisut taaguutaa atuutitiinnarneqassasoq, makku ilaatigut tunngavigalugit:

- Oqaatsip immini imarisai annertoqimmata,
- nassuitsumik killilerneqarsinnaanngimmat, kiisalu
- nalunaarummi erseqqissarneqanngimmat, atuartitsineri suut ilinniartitsissutigineqartarnersut, taamaallaalli anguniagassat kisimik allassimallutik.

- 5 pillugu -

AS.: *Adoptionip* kalaallisut taaguusernissaa kingornussisinnaanermut inatsimmut tunngassuteqarpoq. Oqaaseq **meeravissiarthaarneq** naleqqutinngilaq, meeraq tassaamat inuk ukiukitsoq. Taamaattumik inersimasunngorsimasut



"meeravissiatut" taaneqarsinnaanngillat. Mianersuuttariaqartoq aamma uaniippoq, oqalunnikkut "qitornavik"-mik oqartoqarsinnaanngimmat. Taamaattumik erseqqissartariqarpoq inatsimmut tunngatillugu oqaaseq **qitornavissiaq** taamaallaat atorneqassammat, oqalunnikkut pinnani. AS-ip Oqaasiliortut sinnerlugit tamanna allakkatigut Naalagaaffiup Sinniisoqarfianut erseqqissaasiussavaa.

- 6 pillugu -

CCO.: Isak Johansen *qerinnarpoq* pillugu qanoq taaneqarsinnaaneranik siunnersuuteqanngilaq.

KB.: Issilivikkaangat aatsaat qerinnarsisarpoq. Erngup qerisarnera silamut apeqqutaatinneqarneq ajorpoq.

SG.: Nammineq radiokkut silassamik atuaatilluni 0 grad: "Issisiut nuulumiiippoq"-mik taasarpaa, isumaqarlunilu isumaanut naleqqullunilu kikkunnit tamanit paatsorneqarsinnaanngitsoq.


Qangaanerusoq 0 grad pillugu qanoq oqartoqartarnersoq CCO-p misissoriarlugu nalunaarutinnguamik allagaqassaaq.

- 7 pillugu -

SG-ip tunuarnini aalajangiusimallugu nalunaarutigaa.

NM-ip suliassaq pissanganartillugu soqutiginnilluni nalunaarpoq.

AS nammineq piffissaqarnerunini tunngavigalugu aamma soqutiginnilluni nalunaarpoq.



Oqaasiliortut isumaqatigiipput NM-ip AS-illu akunnerminni tamanna isumaqatigiinniutigissagaat aalajangernerlu februaarip ulluisa qulingiluaat nallertinnagu CCO-imut nalunaarutigissagaat.

- 8 pillugu -

NM.: Erik Fleischerip oqaaserpassuit nalunaarsorsimasai iluatinnaateqarluartut ilaasortanut ilisimatitsissutigai aammalu inuttaata ikiortissaasuaneranut iluusissamik ujartuilluni.

SG.: Erik Fleischer Oqaasileriffimmiit saaffigalugu nalunaarsorsimasai takussutissatut nassiuteqquneqassapput kingornalu Oqaasileriffimiit kiffartuullugu ajornannginnerusumik ikiortissarsiuullugu.

Taava apeqqut una erseqqissartariaqarpoq, Oqaasiliortut ordbogiliortunut qanoq inissisimappat?


CCO.: Oqaasiliortut ordbogip allaqqissaarnermut najoqqutassiap suliarineqartarnera isumagisassaralugulu akisussaaffigaat.

AS.: Ordbogimik saqqummersitsiniartut assigiinngitsut ataatsimut nalilersorlugit misissortariqarput. Tamatuma kingorna aatsaat suleriaqqinnissaannik siunnersuuteqarfigineqarsinnaapput.

- 9 pillugu -

NM.: Jess G. Berthelsenip Siiva Amondsenillu Kangerlussuarmi ataatsimeersuarnermi allakkatigut maalaarutaat saqqummiuppa.

SG.: Jess G. Berthelsenip Siiva Amondsenillu ataatsimeersuarnerup nalaani ataatsimilluunniit oqaatsit allakkani taaneqartut saqqummiutinngilaat, killulli



tungaanut isumaqataalluinnarlutik oqalliseqataapput. Saqqummiunneqartunut uparuaanngillat aammalu sanngiissutsit suunersut nalunngittussaavaat. Silarsuarmioqatitsinnut attaveqarneq pisariaqartikkaluttuinnartillugu kalaallisut oqaatsivut kisiisa atorsinnaanngilavut.


Kiisami inuit assigiinngiaartut naapertuuttumillu sinniisuusut oqaatsit pillugit ataatsimeersuartinneqarput. Taamaattumik allagarisimasaat assut tupaallaatigaa isumaqarlunilu inerniliiarpallaartut.

CCO.: Oqaatsitta salleryaallutik inissisimanissaat assortuussutigineqanngilaq. Oqaatsilli pillugit utersaassanngikkutta qanoq ingerlariaqqissaagut? Tassani Najakkut Thomasilu oqaatsit sammivii sumut ingerlanersut assersuusiorput. Marlunnik oqaaseqarfiunermik oqartarneq eqqunngilaq. Suleqatigiissitap suleriaasissaa killilieriigaq suleqatigiissitap siulittaasuata peqataasunut tamanut paasisitsissutigaa, taamaattumik maalaarut tunngavissaqarsorinannngilaq.

NM.: Saqqummiisut saqqummiussaata saniatigooralugu misissugaapput. Suleqatigiissitami ilaasortat naliliissagunik pimoorussamik misissukkanik toqqammaveqartariaqarput, tamannalu Naatsorsueqqissaartarfiup suleqataaffigiumallugu nalunaarutigereersimavaa.

KB.: Misissuinerit ataatsimeersuarnermi saqqummiussat tunngavigalugit naliliisoqarpoq, suli qallunaatut ingerlassasugut, tamannalu akuersaaruminaappoq, tassa ukiut 100-t siumut naliliisariaqaratta, Danmark kisiat isiginagu.

AS.: Ukiut 100-t siumut kisiisa isiginagit ullumikkut pissutsit aamma isigisariaqarput, ataasiinnarnik oqaasillit katataannginnissaat sianigisariaqarmat. Oqaatsit pillugit oqallinnermi misigissutsit qaffatsinneqartarput, ilaatigut oqaluuserisap tunngavia puigorlugu.



# Oqaasileriffik

## Sprogsekretariatet

---

Oqaasiliortuni ataatsimiineq tullegg pissaag tallimannngornermi februaarip ulluisa 16-ianni, nal. 14.00.

Carl Chr. Olsen  
Siulittaasoq

Kristine Olsvig  
Allatsi

---

### **Oqaasileriffik – Sprogsekretariatet**

Postboks 980, DK-3900 Nuuk, Kalaallit Nunaat, +299 327344, +299 327342 fax),  
[oqaasileriffik@greenet.gl](mailto:oqaasileriffik@greenet.gl)